

թէ նա որսայցէ զնա բանիւք և ուրացուցէ: Եւ առեալ տարան զնա առ մուֆտին, որ էր Պահալի առնուանեալ այր ժպլորհ և ժանդագործ, զոր և նա բազում հնարիւք ոչ կարաց դարձուցանել զնա ի հաւատոցս Քրիստոսի. վասն որոյ և իմացեալ զայս վէզիրին, կրկին մարդ առաքեաց առ մուֆտին զի տացէ ֆէթվայ զի սպանցեն զնա չարաչար. զի այս էր օրէն նոցա, զի առանց մուֆտոյ ֆէթվային զմարդ չէին սպաներ: Եւ մուֆտին ոչ ետ ֆէթվայ, այլ ասացեալ թէ Այսմ բանի ոչ լինի սպանման ֆէթվա, այլ տացեն զնա ի նաւս պատերազմաց: Եւ վէզիրն տվեալ զնա անդ ի նաւն զի թի քարշեցէ անդ կապանօք երկաթի, և ընդ ծառայիցն զամենայն զծանր ծառայութիւնն կրեսցէ: Եւ նա զնաց յօժարաբար և սեռն սրտիւ վասն սիրոյն Քրիստոսի: Եւ յետ աւուրցինչ ելեալ զնացին նաւքն¹⁾ ի պատերազմն, և նա ևս կայր անդ ի չարչար[անս] եւ մի ի թի քաշող[աց]: Եւ շատ ջանացին զերծուցանել զնա հայրն²⁾ և եղբարքն որ աստ էին և ոչ կարացին, այլ զնացին ի պատերազմն և նա էր ի մէջ նոցա անտանելի չարչարանացն համբերեալ: Եւ յետ պատերազմին որ եկին Տաճկունքն, և նա ևս ողջ էր մնացեալ, զոր և վէզիրն ևս սատակեալ էր և յետ նորին Մէլէկն էր եղեալ և յետ նորին Իփշիրս, որ այժմս է: Գնացին հայր³⁾ սորա և եղբարքն առ Մուբատ փաշան, զոր էր նա զափուտան, ծանուցին. և նա ևս զայս իմացեալ ասաց թէ Զի բարի եղեր այս. գայցէ այժմ, դարձցի ի հաւատս մեր և զինքն առնիցեմ ինձ մի հաւատարիմ: Այլ և նա ևս բազումս չարչարեաց ի ծանր և յանարգ ծառայութիւնն, արկանելով անդ ի բանտս գերելոցն և շատ գանելով ջանաց թէ Զեռամբ իմ

1) զնաւքն.

2) հայրքն.

3) հայրք.